

我哋都有

主題樂園



Jack 24歲
油塘晴空青年中心副主席

唔知由幾時開始，社會對我哋呢一代年輕人嘅評價愈嚟愈差，其實當中都有唔少熱血分子，好似我咁，由中學開始已經做義工，啲家仲做埋社區助理嘅工作，從事社區服務令我知道幸福唔係必然，好似唔係個個小朋友都可以去海洋公園同迪士尼樂園玩，但為咗佢哋，我哋夾手夾腳整咗間鬼屋出嚟，見佢哋玩得好開心，先知道唔使一定要畀幾百蚊入場費先買到歡樂。

中學嗰時已經開始去青年中心做義工，會上門探訪獨居老人、幫社區中心搞嘉年華攤位遊戲，識到一班志同道合嘅朋友，覺得幫到人好有意義。後來讀副學士，仲主修埋社區服務管理，決定畢業後要從事社區服務，雖然呢份人工唔係高，9千左右，不過可以繼續幫人。啲家全職搞社區活動，發覺同以前做義工唔同咗，以前只求即時幫到人，冇諗到咁長遠，但啲家就多咗一份使命感，好似我幫助新來港人士融入社會，有責任幫佢適應香港嘅生活，屬長線嘅工作。



▲為咗吓區內小朋友開心，07年萬聖節，可又同一班義工喺油塘邨內搭建間鬼屋出嚟扮鬼扮馬。

呢份工令我改變咗好多，我本身性格

比較靜，開始做嗰時會擔心自己唔夠主動，因為份工要搞活動，接觸好多唔同嘅人，慢慢學識主動、點樣同人相處，做事亦學會思前想後，做足準備工夫，務求搞嘅活動唔會出錯。最難忘係07年萬聖節啱啱入職時，我聽到區內好多小朋友話想去兩大主題樂園睇吓，但因為屋企冇錢，只可以留喺屋企。

3千呎鬼屋吓小朋友

我想幫呢班小朋友完成心願，動員咗六十幾個義工，用咗三十幾個3米×3米嘅攤位帳篷，喺油塘邨憑空搭咗間3千呎嘅鬼屋出嚟。我同成班義工由設計、買道具、搵人化妝，同其他機構借帳篷，由零到一間鬼屋誕生足足籌備咗兩個月，唔

做過都唔知籌備一個活動會咁辛苦同複雜，真係多咗見識。

好記得當日未夠鐘已經有成百人排隊，最後要提早兩個鐘開放，保守估計有4、5百人嚟玩。當晚，無論係大人、細路都玩得好開心，身為統籌嘅我，嗰個時刻得到一份強烈嘅滿足感，只要肯為小朋友花心思，自己造出嚟嘅鬼屋雖然簡簡單單，但帶嚟嘅快樂唔會比真正嘅主題樂園差。

自己係年輕人，我好明白青少年最受朋輩影響，個friend講一句好過父母講十句，我希望以年輕人嘅身份去影響其他年輕人，透過社區活動去改變佢哋嘅家庭觀同價值觀。有本書話我哋呢一代嘅香港人係失敗者，所以我哋一定要加倍努力證明畀呢個社會睇，我哋唔係咁差嘅。Ⓜ